

DIARIO TA PRESENTA


VOZNAN DI PUEBLO

Kico bo ta opina di e fenomeno di "topless" riba nos beachnan?




Nataly Gallardo Arends
Sales Girl

"Pa tin topless riba nos beachnan no ta un bon idea. Prome, nos muchanan chiquito mester un bon ehemplo y pa wak nos como mayornan haci'e no ta bon. Nos como hende grandi nos mester duna nos muchanan, cu ta nos futuro, normanan di moral halto".



Angelique Kelly
Estudiante E.P.I.

"Como un Arubiana mi no ta haya esaki un bunita bista, specialmente ora mi bay lama cu mucha of den famia. Nos respet, norma y balornan ta bayendo poco poco perdi".



Guillermo de Freitas
Maestro di School

"Mi ta haya cu mester muestra mas respet pa cu otro hendenan cu ta usa nos beachnan. Principalmente nos cu ta bay cu muchanan di school na Baby Beach pa e lesnan di landamento, tur diahuebs, varios biaha caba nos a haya nos confronta cu e fenomeno aki, anto dilanti di muchanan di un derde klas, loke mi ta haya un falta di respet cu e muchanan cu ta bay siña landa. Polis mester controla esaki y actua tambe contra e usuarianan ey".



Elizabeth Frans
Sales Girl

"Pa experiencia cu mi a pasa cu nietonan riba beach publico mi ta haya cu e no ta un bista bunita pa muchanan inocente, cu nos mes ta lanta cu normanan di respet na cas, y pa nan respeta otro pafo di cas tambe".



Soraya Everon
Cahero

"Nos como adulto por mira topless na un manera un poco mas natural, pero no ta asina cu nos muchanan. Mi ta haya cu nos muchanan cu ta bay beach merece di mas respet door di adultonan, pesey mi opinion ta cu topless no ta bon den playanan publico".

© 1998 — Matutino DIARIO Aruba

Homber furioso na warda di Polis

ORANJESTAD (AAN): Na Warda di Polis di San Nicolas, den oranan di marduga a presenta un homber pa denuncia actitud di Patruya relaciona cu un asistencia.

Segun e denunciante e no tabata di acuerdo e forma di proceder di e Polis(nan). Esnan cu a atende e homber aki na Warda di Polis, a conseha e persona ki pa pasa Dialuna cerca e hefe encarga cu e seccion.

Parce cu e homber aki no a keda contento cu e contesta ricibi na Warda di Polis, y el a cuminsa zundra esnan presente.

Na dado momento, Polis a dicidi saca e homber for di Warda di Polis. E homber masha disgusta finalmente e tira schop riba porta. Aki si comandante a hala su atencion formal pa su actitud. Algun amigo a hiba e denunciante furioso su cas.

NO POR, SI POR SYNDROME!!

